



普濟戰紀

第四冊

U 9
6255
4



79
6255
4

普法戰紀卷四



南海 張宗良 芝軒 口繹
吳郡 王 韜 紫詮 輯撰



法自師丹之戰。國蹙王降。喪敗之辱。未有甚於此者。其禍亦未有烈且速於此者。日耳曼國紳民。初得電報。知降事。無不鼓掌稱奇。日則升旗。宵則懸燈。衢市間歡聲雷動。遙慶普王。齊呼萬歲。英國美國聞其事。亦皆駭愕。普民之旅於其地者。張讌屬賀。謳歌之聲。徹於宵旦。普王即於師丹城外。特行大酺禮。盛犒軍士。賜讌於群臣。堂上稱觴。堂下奏樂。無不舉杯相屬。互為勸酬。以期盡歡極樂。酒半。普王離席言曰。今日之勝。皆由群帥出奇。

三軍用命。首相俾思麥才不世出。國士無雙。勵精圖治。用能振興我國家。軍師毛奇。知人善任。智略非常。用能折衝於行伍。將軍欒鋒銳。無前如始。淬之劍。百折不摧。用能壯我軍威。故使寡人得以至此。尙其畧分言情。歡然痛飲。嗚呼。其曷敢忘汝等功哉。按法國於一千年中。因兵戰敗績。王爲係虜者。至今已七人。今降普之王。爲前王拿破崙第一之姪。名釵魯斯路易。生於一千八百有八年四月二十日。失位時。春秋六十有三。其父魯斯拿破崙。曾入繼荷蘭國王。法王其第三子也。其母乃呵甸士王后。固貴胄也。幼從阿巴特崙腓立李巴爲師。肄習文藝。少長游學四方。曾讀書於阿利年白瑞士敦棣各學校。學兵法於都孚將軍。得其真傳。諳通韜畧。後隸

兵籍。一千八百三十一年。法國加般拿利邑民作亂。法王亦在叛中。旋遣官宣撫。叛黨解散。其事始定。一千八百三十六年十月三十日。士打拉士卜民。揭竿謀叛。法王實爲倡首。是年冬十有一月。官兵討平之。擒叛首賓諸獄。既定罪。流之亞墨利加之魯靈。明年九月。仍返歐洲。一千八百四十年八月六日。法王旅於波龍。糾衆起爲亂。旋爲官軍所獲。集訊於刑部。至是年十月九日。爰書乃定。永禁獄中。一千八百四十六年五月二十四日。有名儒鐸德。寄紐憐之。脫其桎梏。潛令之逸。乃由咸邑法源海屬地出遁於外。修德改行。鄉里稱焉。一千八百四十八年八月。民間公舉之爲紳士。預議事列。九月二十一年二月十日。以民衆推戴。舉爲法國議事大臣。居大統領

位。以四年爲一任。期滿他選。時公舉者凡五百五十六萬二千八百三十四人。與衆盟誓。而後就職。一千八百五十一年。屆期將撤任。民間籲留者紛至。請再任。十二月二十一日。公舉留任者。其數至七百四十三萬九千二百十有六人。以十年爲期請。一千八百五十二年十一月二十二日。勸稱尊號者。凡七百八十六萬四千一百八十九人。通國臣民交章勸進。其間依違不從者。僅二十三萬一千一百四十五人而已。遂於十二月一日。卽眞嗣位。號恩伯臘。稱制於國中。位號拿破崙第三。一千八百五十三年正月二十九日。納后行策立禮。后爲西班牙侯爵滿丁谷第二女。名有尖尼馬利低滿丁谷。生於一千八百二十六年五月五日。后

少在英國讀書。后母馬利門祖。籍英之蘇格蘭天主教人。後亦學於法京書塾。曾於一千八百五十年。徧游歐洲列國。攬其山川風物。后通文史。明禮教。閨範卓然。爲宮壺表率焉。一千八百五十六年三月十六日。誕生王長子。命名有尖路。路易拿破崙。卽今從軍之王子也。王在位時所立新例。頒行通國。略有數條。一立國位世傳之例。定於一千八百五十二年十二月七日。凡君薨。其位由王子承襲。以長幼爲序。無子立姪。或依次選於族中。則循例當立拿破崙第一之子孫。如均無嗣。則詔上下議院。公行推舉公舉之例。以執籌之多寡。定其人之賢否。苟爲衆望所歸者。無論何人。俱可得立。此於立子立長之外。更創立賢之例也。一立國政自主。此指國君獨爲主也。之例。

始於一千八百五十一年十二月二十一日。嗣後續有增加。佐理之臣。凡區五等。一議政局。出納王命。宣布國中。二六部大臣。惟王得以選授。三軍機大臣。得以創議律例。然當與部臣。和同參酌。視其意旨之所定。四議院紳士。由國人公舉。五名。臣賢士有權位者。若犯國例。治之與民同。惟不得苛刻。所定自主之例。則以王者獨攬乾綱。總持朝議。全具權能。稱爲聖身。不得傷黜陟恩威。惟命是行。勢無可比。貴有常尊。此外如兵額之增減。戰事之興輟。通商立約。主和講好。一切俱歸其掌握。他人毋得參一議焉。凡國中各衙署。所定律例。必由朝廷準行。然後頒發。其策名仕版。立身朝宇者。必在王前。親發誓言。守以終身。遇有大政事。集衆籌議。上院爵紳。可以攻

詰廷臣。而廷臣不得專主其說。所立軍機大臣。約四五十員。苟有違法徇私者。由王立予罷斥。軍機所議之律。下之爵紳。論其可否。然後軍機宣之於上下議院。律法所在。必當謹爲維持。毋使或犯。每值議政時。所立軍機大臣多寡無定額。惟王意旨所屬。歲給俸糈二萬五千佛狼。下院紳士。則由民間推舉。每舉以若干年爲期。期滿無得久於其位。此皆法王在位時。所行新定之例也。至於供給國王御庫者。仍循歐洲向例。每歲度支之數。皆有限額。內帑所支。計佛狼二十五兆。此外撥官地一區。爲皇莊。賦稅維正之供。歲得佛狼十二兆。其名園廣圍。叢林牧場之屬於王者。物產蕃庶。年中俱有生息。一千八百五十二年正月二十二日。又割阿零土地數十

頃以充公。統核御庫所入。歲得佛狼四十二兆。然法王時有額外需。因之御庫不足。則貸國債。自卽位以來。積至佛狼一百兆。若夫前後武功之盛。則有赫然震於遐邇者。一千八百五十三年。與英土及撒丁合兵攻俄。首尾用師三年。攻城奪地。毀壘焚船。幾於過半。俄不能支。遂議和。一千八百五十六年。列國公使立約於巴黎。斯由是法之兵威。雄於海外。一千八百五十七年。用兵安南。割其細江三省爲屬地。設兵置戍。建堡通商。以便東道之轉輸。旋又以小釁出師。侵叙利亞省。屢戡北阿洲之亂。遣臣里息往埃及。開鑿新河。綿延四百餘里。使地中海與紅海合而爲一。東西往來郵船。至此無所阻。凡閱九年始成。一千八百五十九年。助撒丁國叛奧。撒丁

者。以大利之屬國也。與法故姻婭。時奧兵已破其國。故法特援之。卒敗奧兵。割地議和而還。一千八百六十六年。攻朝鮮未下。又用兵於墨。是哥圖據其土地。於其國都。戍以重兵。民衆不服。屢相攻擊。卒撤戍兵歸。一千八百七十年。以爭立西班牙王子。與普構兵。普人先興師伐之。懸軍深入其境。法王兵敗於師丹。遂降。普遷之。至加須兒城。幽居不樂。發憤著書。自踐位以至失國。凡二十有三年。於是拿破崙朝終。逸史氏王韜曰。拿破崙第三。亦一雄才大略之主也。徒以好兵樂戰。弗戢自焚。遂至失地喪師。去位弱國。惜哉。然我常推原其故。失國之由。不僅於是。子輿氏有言曰。國必自伐。而後人伐之。苟非內亂已萌。則外侮必不作也。余於庚午春初。自英將

返中土。道出巴黎斯。與鐸德儒蓮相見於學院。見兵士持戟巡伺於道者。狀殊嚴肅。若備大敵。心甚異之。又聞逆旅主人告予曰。兵士見衢市有聚衆偶語者。則鳴鎗擊之。問何以故。則慮其謀爲變也。以去歲民間請法王貶去尊號。俾民得以自主。法王怒不許。因廣募兵士。爲之彈壓。羽林飲飛之選。遂倍於常時。故民間莫敢妄動。是時法國方盛強。無敵國外患。而余特惴惴焉知其國之不足恃。不意不一年間。一敗至是。子輿氏之言信哉。至於內叛之興。亦由法王之負約有以召之。初前王拿破崙第一之被廢也。國人革傳位之例。仿美國法。簡立賢者爲君。永著令甲。以期不變。法王之得國。原由於群情仰附。既在位。威福自擅。政令由己。又欲傳祚於子。是

以大拂民情。竟至於亂。嗚呼。觀其君臣之間。互相猜忌。各自爲黨。內外幾若水火。卽無普國之攻。亦必有變。當法與普戰也。民有渙心。士無鬪志。故普得以至是。不然當不至於斯極也。然則法之弱。法人自取之也。於普何尤。法國大臣聞法王之降於普也。集而議於朝。曰。兵敗矣。王降矣。國危矣。可奈何。第國不可一日無君。民不可一日無主。盍選於衆以爲統領。暫行攝位。俾治國事。於是謀於兆衆。仍循公舉之例。請大將德祿蘇攝位統軍。治理政刑。京中紳民願舉者。約四十餘萬。今則暫行攝理。事平則集衆再議。以定去留。至於九部大臣。盡行更易。外部總理各國事。則儒理發孚主之。內部則監必得主之。兵部則將軍李福羅主之。海部則富禮商主之。刑

部則格禮模主之。戶部則比加德主之。禮部則儒理西門主之。農部則麥壬主之。工部則陶利行主之。九部區授已定。發孚乃以電報布告各邦曰。天禍敝國。兵敗王虜。然國不可無君。民不可無主。今已循美國立賢之法。簡擇新君。統攝國位。敢告時各國有許者。有未許者。於是傳諭國中軍民。咸知舊君已降。新朝已建。各一乃心力。以保國家。於是護國統領所頒誥諭。四處懸貼。其言謂。依一千七百九十二年之例。嗣後永爲民主國。且必爲國報仇。協力同心。退敵出境。卽日來昂城波都城克連怒步城。并及南北兩境各大城。皆自爲民主之國。各處居民。無不大聲疾呼曰。威父刺理北力。蓋法國語也。意卽謂長爲民主之國。列國聞之。或有以爲是者。或有

以爲非者。所議紛然。莫衷於一。惟英京所刊日報。皆刺譏其所舉過當。此亦足以見公議之不可泯也。九月五日。護國廷臣檄普王。出法國境。當法京紛亂之時。法后方居條刺厘殿。左右侍從。咸自散走。坐困宮中。不得出。俄有大臣來告曰。事急矣。請后出奔全命。后意猶豫未決。涕泣如雨。始欲自裁。繼念不如走避他國。再爲後圖。乃偕兩大臣。由宮後僻道行。顧後宮門亦皆上鍵。一大臣呼守者。振管闢扉。麾民使退。后以黑紗蔽面而出。不令人見。旁有童子言曰。后出矣。時人聲鼎沸。衆皆不聞。后乃潛乘輪車。取道往比利時。法國王子已先遁於英。蓋衆謀廢置。其勢方張。王子之不得不去者勢也。當師丹之未降也。九月一日。法京集衆議事。大臣芝倫載核

在上議院言曰。今者大將軍巴彥。困守茂土。阻於重圍。不能再出。經略麥馬韓。以二十萬衆。欲援巴彥。而不果。爲敵軍所襲退。駐師丹。數日之間。屢戰屢北。彼氣方張。我軍久挫。揆其形勢。必不可保。寇深矣。可若何。所幸者。下議院衆紳。竭力贊襄。不辭勞瘁。京師民人。志齊心固。尙堪共濟時艱。背城借一。其訪於有衆。我國中尙有略不世出。學邁時流。兼文武之資。具折衝之任。爲國家禦患雪耻。挽回此逆境者乎。至於京師。爲首要之區。當必力籌保護。內外礮臺。鎮以重兵。通衢大路。守以巡卒。甯使葬身灰燼。誓不以京師尺寸之地與人。惟我同志。尙其勉之。下議院意見亦同。曰。必固守效死。勿去。於是京師紳民。皆以戰守相持。爲不易之論。民間亦互相勗。皆

曰。必報讐。甯事異國。越日知師丹之降。京中大擾。九月三日夜半。下議院諸紳群集。首相宣諭於衆。詞氣慷慨。衆爲竦動。翼晨。傳諭衆民。其略曰。今者王師敗績。國勢艱屯。然壯志尙存。雄心猶奮。衆情雖屢挫。而可用。銳氣卽百折。而不回。京師內外。咸駐重兵。來因河濱。廣招勁旅。助援之軍。新募之衆。不數日間。雲集響應。必當比權量力。度勢審時。以再與敵軍從事。凡爾衆民。尙其激勵於胸懷。勿沮傷乎志氣。以忠義爲甲冑。以靜固爲城垣。蠢茲敵人。盡驅出境。勿留遺醜。建功立業。正在斯時。法國舉德祿蘇攝位後。自稱嗣後永爲民主之國。師丹角戰之日。巴彥之兵。出至普營挑戰。結陳於哥些耳鄉。亥刻。兩軍相交。各奮力死鬪。互持至丑正。始各罷兵。翼日

昧爽重整士卒再決勝負。法攻普拒。猛氣百倍。久之法兵鋒銳少挫。而普軍無不以一當十。午正擊退法軍。陳傷者枕籍山谷間。而普兵無少損。蓋當戰時。普軍皆伏地避礮。故彈不能及。二日巴彥遁守茂士。爲普郡王所困。不得出。是時已知法王退駐師丹。麥馬韓從行。扈駕聲勢不復聯絡。巴彥乃復訓勵軍士。勉以大義。欲冒死突圍而走。布陳索戰。兩軍始合。皆殊死相抗。法軍奮力爭先。有進而無退。勢甚猛銳。普郡王親自督陳。衆兵有一退縮者。立斬以徇。於是普軍人自爲戰。呼聲動天地。相持至日西墜。撤隊各返。是役也。普軍死傷者六百人。法軍損失者亦不少。於是茂士之圍益密。普軍先築長圍。以困茂士。皆以電線環布其四周。一遇兵警。俄頃之

間可集八千人。兩刻許。可集至二萬二千人。其神速如此。附近茂士村鄉。皆以兵士晝夜邏巡。告誡法民。無得妄毀電線。如傳遞之時。偶有不靈。則惟鄉民是問。旋於以便利鄉。有法之農民嫉而斷棄之。爲普軍所知。罰其鄉。償繳佛狼二十萬。以示儆戒。是日晚刻。有法人於街衢間。得所張揭帖。言法軍已獲大捷。普郡王偕其將士。群死於緬低河。大抵法官之欲安民心者。妄造是言也。按師丹之降。共俘法軍八萬七千人。統兵員弁四千人。偏裨協副將軍五十人。大礮五百五十尊。墨迭兒魯士礮七十尊。馬一萬匹。輜重不可勝紀。是役也。普法兵士陳亡者約數萬。有隨營文士。翼日往觀戰場。返述其慘目傷心之狀。幾於不忍見聞。其間折肢裂體。剖腹披腸。

斷鏃貫顱。飛丸入骨。縱橫枕籍。殆不可辨。遺衣在地。血痕腦跡。凝聚其上。肝膽墮於泥塗。骨肉膏乎草木。古今來爭戰之苦。未有如此者也。師丹界於比利時境。事後暴骨如莽。雖經好事者。爲之埋瘞。然亦祇草率了事。以致穢氣逼人。腥聞於遠。比利時人。恐其轉輾侵染。致生疫癘。特遣幹員數人。前往設法屏除。比官親蒞其境。將所築葬坑。盡行鑿開。先灌以草麻油。次灌以石油。然後加以薪蒸。舉火焚之。凡歷數時許。所有臭黷腐肌。悉付一燼。其尙存枯骨。又灌以辟穢藥水。迨後復以土泥。填築葬坑。乃始回國報命。日報文士。更述瑣事二則。亦有歎歎足志者。始西國設有同懷會。蓋聯異姓爲手足者也。其會尙意誼。畧勢分。是以上自王公貴人。下逮草野

布衣。無不可入。且其會相通甚廣。不限於一國。蓋聲氣所及。不分畛域。無間遐邇也。是役中有同盟二人而偕受傷者。其一爲普之統兵官。其一爲法之弁目。當時師丹之役。過於秦楚鉅鹿之戰。鎗礮之聲。震山谷。奔雷電。裂肝腦。而委泥沙者。不知凡幾。二人皆中傷臥地。神魂如遊墟墓。少焉法官漸甦。痛楚思援。張目四顧。見同臥戰場。而相離不遠者。爲相識之普官。微呼之。不應。舉手而示。以求拯之意。弗顧如初。蓋普官時猶暈絕也。法官視之。深爲嘆息而已。已而普官亦甦。作呻吟聲。法官再與語。且道及會中事。普官遂悟。爲會中人。然相遇於疆場之間。聚會於生死之際。彼之不能拯此。猶此之不能拯彼也。而二人忘胡越。置死生。叙述向誼。謂會中人。戰

中士如吾兩人今日之聚者實爲鮮有。娓娓深談。轉忘創痛。頃之而醫士至。蓋西國戰事甫竟。卽有醫士踵至戰場。檢載受傷者。歸而調治。然是日所來醫士。非隨營官醫。乃善士集資所延者也。醫至。二人囑其同車並載。無使相離。醫士以兩人本敵國也。而相愛若此。異之。審其故。兩人具以直告。醫士亟稱奇遇。兩人聞言。亦異而轉詰之。醫士曰。我之於二君。亦猶二君之於我也。二人始悟。醫士亦會中人。吁。彼兩人者。始而性命相搏。終而膠漆相投。不亦異歟。使兩不受傷。固無由會晤。或一傷一不傷。亦無從覲面。則此同傷相恤。殆出前緣。而又有。一治傷之醫士。亦屬同盟。雖曰偶爾遭逢。而冥冥中不可謂非有定數也。有一日耳曼軍士。爲一飛礮中右肩。

其傷甚劇。醫士驗之。謂閱片時卽死。軍士於數刻中。忍痛抽筆。就地作書。以別所知。書竟擲筆。氣絕。書與一小像同函。啓視之。一媚好女子也。人乃爲寄歸於其家。噫。其人當絕脰捐軀之際。而猶不能忘情於燕婉。若此。謂非深於情者哉。是則可志也已。普軍所有陳擒法國兵士。解回普營後。卽按名給以烟酒。其餘糗糒衣履。無不豐足具備。其優於待敵也如此。在師丹共俘法兵九萬。於九月五日。由師丹遞解普國。以二萬人爲一隊。普軍各路均設電線。飛遞消息。甚易且速。其轉運軍糈。專用火輪車路。故軍中所需。無不充足。於師丹所獲法國之鎗礮器械。立卽分授軍中。以爲進攻之具。法之利器。所以攻普者。至此普轉藉之以攻法。古之所謂借矛陷。

盾者。殆不過是也。普軍中兵餉浩繁。每日需用佛狼一

千五十萬。約銀數二百餘萬圓。誠非常之巨費也。按佛狼一

算。勝則速備進取。敗亦預謀歸路。蓋能進能退。乃兵家

之要着。况普國懸軍深入。越境攻人。不先料進。必先料

退。故普於進退之間。極為致意。雖日攻城掠地。有進而

無退。而無不步步為可退之計。此普之所以稱能兵也。

或謂普軍進攻法京。若不能制勝。則退兵之時。恐所圍

法國各城之兵。皆不能守。法可轉敗為勝。斯言也。雖曰

知兵。然非所語於普之行師也。當普軍圍師丹城時。兵

衆二十四萬。法軍十萬而已。受降之後。普軍二十萬。專

向法京。更以騎兵二萬五千為前鋒。時法國京師已集

兵三十萬。為守城計。向時所選諸執政。皆退位解職。先

是法國廷臣。料普軍之必至法京也。諭民間儲積糶糧。

以備日用。有附郭民人五萬。由城外徙居城內。有自他

郡運載食物至者。計麵粉三十五萬担。米十五萬石。牛

十五萬頭。羊五十萬頭。鹵肉七百萬斤。糖鹽茶葉加非。

可支三月。酒可支半年。民間預籌儲蓄。皆入市購取。因

是塵肆囂闐。日不暇給。公家特派兵役。為之守衛鋪戶。

廷臣出示。諭令農夫攜取蘋果入京。自必厚為給價。故

法京之食。尚可支持。法后往至哈士定。法公主哥魯西

耳。往士威斯蘭。法王子行至南苗亞。遭疾暫止。法幼公

主摩西耳。小駐雕鼻。為普軍所得。九月七日。法王子力

疾遄征抵哈士定。旋由阿電士往都華河。渡河至英。八

日。法后始抵英都。與法王子相見。是時普軍之偵探者。已至飛士迷。普軍在符羅候士左右。群渡禮晤河。分兵爲三。直搗法京。九月五日。普王普王子普郡王薩慎尼邦王子首相。統率大軍。陸續啓行。同時並進。九月八日。普將督催諸軍。迅速齊發。是夕。大營進箭。魯吳呢排尼左右。自蔑士至法京。所有險隘之地。皆留普軍爲屯守。其扼要之城。皆分兵圍攻。以遏其內援。普軍之在外者。不下十有四萬。八日。普軍往攻捫迷地。爲法軍所擊退。特其邑城垣。半已殘毀。法人之守士打拉士卜也。志固力齊。日久不能下。普軍攻圍益急。僅離城外礮臺五百步。環列大礮百尊。向城轟擊。晝夜不絕聲。礮臺基石。摧隳如粉。而官民嬰城守禦。曾不少懈。九月九日。鎮守是

城之大將。願循西國例。獻城納款。普人不許。仍用大礮環攻。然城堅猝不可拔也。九日。魯吳守城官。獻城納款。普兵入城據守。旁有小礮臺。內儲火藥甚饒。猝爾燃燒。焚斃日耳曼兵士九十五人。法兵三百人。後普將細加推勘。乃悉致火之由。非緣統兵員弁之不謹。實司礮者失慎所致。九月十日。普軍進攻土魯城。法兵出戰擊退之。陳傷多人。普軍別隊之攻腮辰者。將下之。諭以舉城出降。獻礮臺於普。法之鎮守地方官弗從。是日。普軍大隊分五路進師。其時前隊僅距法京百里。夜宿門馬厘路。十一日。普軍進至克厘士鼻。夜宿哥倫摩士。十二日。進抵迷倫。普國進軍甚速。法京震動。法阿連士王子起勤王之師。往援京師。以助守禦。西班牙都中。聞法京告

警之信。益兵防衛。法國駐劄俄京英京奧京公使。盡已撤委。別簡新員。法國總理外國事務大臣。致書法之駐劄各國公使云。普王向者有言。普所與戰者。拿破崙朝耳。非讐法國也。今王已去位。法則尙存。而普乃進兵益猛。此何意也。然法固不欲開罪於普。亦願和耳。惟割地乞憐。法所不爲也。法國之地。斷不能以尺寸與人。普若不可。則聽其所爲而已。京師重地。今已極力防禦。普軍若至斯。與之決戰耳。以是知普非讐王直讐法也。開釁之端。在普而不在法也。明矣。時美國西班牙瑞士比利時。皆許法國爲民主之國。與之遣使往來。皆欲爲之居間勸和。美國亦樂爲效力。英亦函致普王。請其暫行息兵。普國民人聞之。具言於普王曰。戰之始。兩國主之。則

和之端。亦惟兩國主之。各國既未助主戰。亦毋助主和。更刊於日報曰。法國今已殊稱號。改舊章。自立朝廷。各國例。不得預其事。九月十四日。南北日耳曼諸邦。以普王聲施赫然。願推之爲盟主。以期嗣後一體相聯。同奉一朝廷。共聚一議院。先商之於普相。而後舉行。先二日。普相屯兵於廉士。有西國日報主筆之士。特往大營。通名進謁。談論普法用兵事。普相曰。提三十萬衆。深入敵境。人人知其不易矣。抑知此猶未爲難也。我普國之師。其始進也。向西。其繼發也。向北。迨乎追奔逐北。轉而趨東北。師丹之戰。俘敵軍十餘萬。然後列旗建鼓。逕指西南。其曲折馳赴。豈易事哉。我普國之進兵也。具有方略。日行九十里。不以爲疲。其行三十里者。皆從容不迫。好

整以暇。他國之行軍。未有能如此者也。士曰。以公明見度之。法民果能守衛京師否耶。普相曰。我何用攻之一策哉。士曰。既不出於攻。將以何策下法京。普相曰。善戰者待其衰。善攻者承其敝。糗糧絕。士氣竭。口腹飢。民志離。外濠築。則重關開。長圍成。則堅城拔矣。士曰。法京之地。非彈丸也。若欲環而困之。非一百二十萬之衆。不爲功。普相曰。圍法不同。各視其用。布置疎密。因地而施。圍三開一。待其逸。環布固繞。絕其出。此皆兵法也。我今以尖角法圍之。則用兵少。而收功易。每以二隊相距爲犄角。相間之處。以騎兵爲往來應援。晝夜巡防。無使少懈。則雖顆粟粒米。無自入城矣。何用力攻勞。吾軍士委性命於蟲沙。飛血肉於礮火哉。惟彼法京。豈無勇士。我攻

彼拒。彼蹶我疲。非計之得也。是故善戰不如善困。扼隘勝於搏野。接濟路窮。心志日渙。外援不至。內變將作。潰敗之機。可以立見。於是我乘間以攻之。易於摧枯拉朽。安用以頭撞壁。自取煩惱也乎。士曰。是謀其必濟乎。普相曰。君試觀之。普取法京。必從此策。士曰。然則普國以逸待勞。欲使法京自困。恐曠日持久。彼得以爲備。聞法國將在來亞河南方。招集新軍矣。普相曰。此乃持兵之民。實非軍也。前之戰於勝棉里濠也。普僅興一旅之師耳。而陳擒其將士千五百人。以不教之民。而驅之戰。雖多奚爲。雖然。法民能操演三月。卽成勁旅。惟我必不假以時日。使之從容習練。若彼徒促之使戰。是無異置之死地也。空蹈白刃。爲可憫耳。士曰。是則然矣。顧戰事之

竟必出於和。敢聞和之道若何。普相掀髯而笑曰。至

今時而言議和。與誰立約乎。將與其廷上諸公乎。原文廷上諸公

即謂好談論喜遊惰之輩意不能與之立和約者也

抑與其使臣乎。當法王之納款於師

丹也。我見而與之言。卽問之曰。兩國將自此息兵講好乎。法王遽答我云。唯唯否否不然。朕今爲降虜。豈能主和定約也哉。其權自在法京耳。法后猶總朝政。廷臣共執國權。朕何能爲哉。由此觀之。法后居內綜理事機。則法之朝廷仍當繫之法王也。士曰。今者法后出亡。王子外遜。可謂之棄位失國乎。普相曰。以我言之。則不然也。今法后之見逼於廷上諸公。猶下議院之見逼罷議也。然若輩所爲。殊未合理。彼豈能自立以主國哉。今所徵調之水師戰艦。將從誰之命爲進退乎。被圍蔑士之軍。

將從誰之命爲戰鬪乎。或者巴彥之心。猶不忘故君。尙戴法王。若然則我許其往法京。夫以巴彥及麾下諸軍。前往法京。爲之主持其間。其勝於廷上諸公。及所稱新立之朝多矣。至於法京中如何行政施仁。發號出令。紀綱體要。規度事宜。則在彼自爲之耳。我不必指示其旁。而爲之贊一辭也。嗚呼。斗筲之流。罔知遠慮。乘危竊據。妄干大寶。彼欲自知其國中民心之向背。恐甚難矣。然此皆彼國中事。無預於我。我儕惟知得遂我所請已耳。且我普國非有廣人民闢土地之心也。如將昔年旅法之日人。凡通解法國之言語者。盡隸普國民籍。列於編氓。亦徒多事耳。但此百年之間。法國借事生釁。非止一次。屈指計之。至此戰已二十有五。前者南北日耳曼。各

自爲邦。遂相離逃。今則轉離逃。而爲和同。患難兼顧。緩急相維。合德同心。併力一志。故得以挫厥鋒銳。遏其驕凌。至此而尙望與法國求成講好。適墮其術中耳。縱使持平立約。一切俯從。委曲遷就。惟命是聽。土地不必割。餉項不必償。而彼肯蠲忿恨。敦輯和平乎。殆不然也。汝國昔年華鐵路之戰。彼何嘗一刻忘之哉。其不行報復者。幸耳。沙都華之戰。無預於法國事。彼猶弗忘。况師丹之戰。其能無介於乎胸中。夫有戰。勢必有和。而善爲和者。必能有以制之。使不爲後日患。我之必取。士打拉士卜蔑士兩郡之地者。原以固我疆圉。拒彼攻擊計也。我之欲得土地。所志原不在城邑也。惟求厚樹屏藩。用免兵革而已。當用兵之初。若法王先選精騎。趨攻南日耳曼。

懸軍深入其境。我國此時。兵猶未及束甲。馬猶未及秣芻。不必兩兵相交。而勝負之權。彼已操之在握。乃彼終不計及乎此。是則我所未解也。矧法之徵調。速於我國。中常儲兵十有五萬。令至卽行。捷同呼吸。若我國。則猝不辦此也。至於進兵之機。今雖失策。後必取償我國。若不早爲之。所以厚樹其藩籬。嚴飭其防衛。用杜彼狡焉思逞之懷。則彼雖不得逞於此。必將求逞於彼。使其兵出南邦。則我失其援矣。尙憶南邦戈天畢先王。嘗謂我曰。爾我肝胆相許。可無異慮。設使一旦敵人驟攻我國。其時我方在爾營。讌樂一聞。此耗。則將何以處之。恐我民以情蹙。勢窮。籲我與敵求和乞盟。城下矣。此戈天畢先王語也。若我邦不自強。以拒法國。其禍何以異是。故

我必取士打拉士卜者。所以整頓邊防也。必割蔑士者。所以捍蔽鄰壤也。如我不得志於此。更戰十年。亦將未已。士聞言愕然。久之因問曰。聞法國總理外部事務大臣發孚。有書致公。曾見之否。曰見之。此從英國總理外部事務衙門所傳遞者也。我雖不欲受書。以發孚爲法廷大臣。但至由英國。不能不爲之留意。法國尙書甚欲知我肯受其書。彼言必當保全法國土地。方與我結盟立約。然何以不更言必償餉於彼國乎。此則我所甚異也。若議和大局。由法王主持。則俄澳意諸友邦。必樂爲之助理於其間。今法已自爲民主之國。則適以動諸友邦之疑。而無從措手耳。傾襟旣罄。士遂別普相而行。普軍圍法京。漸逼法廷執政者。擬遷都多亞城。出諭宣示

衆民。刑部大臣先行馳往。撫勵衆士。宜竭盡忠赤。以翌助國家。阿連士王子奉命離法京。鎮守阿連郡城。以備普兵之來攻也。是日。法國老臣爹亞由法京啓行。遊說列國。設法以退普軍。蓋法京臣民咸望各不偏助之國。請於普王暫行息兵。列國公使遷居多亞城之舉。暫爲緩期。以爹亞昔有不戰之議。智識深遠。故公行推舉。出使列邦。爹亞先至英京倫敦。謁見總理外國事務大臣。但求勸導普王退兵出境。而所以求其退兵之故。將若何以爲酬犒者。卒未能明言。故英之廷臣無由藉手。爲之調停。美國朝廷亦有言曰。若普相俾思麥不樂別國代爲勸和。則敝邦亦不敢預聞。俾思麥知爹亞效策士遊說之習。將以利害感動列國。乃致書於歐洲列國使

臣。蓋先發以制人也。九月十三日。普相屯營斂晤士。作第一書云。諸公爲敵國故。出爲排難解紛。甚盛意也。甚美舉也。顧所以議和者。爲暫時耶。爲久計耶。敵國惟欲爲日後永敦輯睦地。故設法圖維。務歸至善。欲使後日法國再不與日耳曼諸邦開釁啓爭。南日耳曼與法境。犬牙交錯。土壤毗連。並無範圍以爲捍蔽。是以法國苟有戰事。必由此而入。敵國將何以禦之。非取邊界之礮臺歸於敵國。則不能奪其所恃。以消彼侵凌之志耳。豈敵國好開疆闢土哉。實謀自保而已。惟祈鑒之。翼日。普相行抵蕪邑。九月十六日。作第二書云。今法國無君。自稱民主。所有國政。盡已革更。日耳曼列邦。雅不欲預聞於其間。誰爲主朝綱。誰爲執軍政。亦姑聽之而已。惟敵

國所知者。拿破崙一朝耳。士打拉士卜茂士兩郡。若爲法國所有。則其藩籬鞏固。百倍日邦。敵國欲割此兩郡者。原爲拒敵計。非爲攻敵計。若日耳曼諸邦。則斷不敢先啓釁端耳。設使空言和議。誠何所裨。敵國雖欲獨敦輯睦。亦勢有不能。因彼一旦兵強餉足。卽欲狡焉思逞。報讐之舉。捷於轉瞬。則我國家將何以爲捍禦耶。夫歐洲昇平之福。敵國方且欲與人共享之。而遑敢獨壞之。此役之興。原出於不得已而拒之耳。今糜餉糈。費兵力。勞乘輿。苦將士。無非欲割此兩郡。以底於平和也。此列國之所知也。敢卽圖之。曷勝企望。九月十二日。法國戰船。由波羅的海駛回。九月十三日。普軍進攻沙呢。監邊布魯雲士三邑。均已屯筭重兵。築營建壘。爲久駐計。所

有嘉卑耳克厘兒兩處火輪車路鐵橋。法國皆自行毀除。懼普兵乘之以逕渡也。巴黎斯都城紛然籌備攻守之具。四城衝要之地。布置已齊。城外林木叢雜處。悉行縱火焚之。俾普軍不得有所隱蔽也。普營偵諜之人。遍布法京城外。有行抵都尖沙仙村堡者。旋卽爲法民逐去之。摩文宏士兩地。皆探卒經行出入處也。於是普軍漸進。屯營於哥羅窩加士頓亞刺士譚三邑。九月十六日。普國大營進屯燕邑。特遣別將統兵一萬八千。圍攻土魯城。環之三匝。是日凌晨。普軍首隊分三路並進。一抵栽威路。一抵理般刺兒佛。一抵美倫。其行師之速。若颺風急雨之颯至。近京各大郡。無不聞警恐惶。急謀保衛。普軍所經之地。小有接仗。以是時方擬轉向法京。統

隊逕前。不遑他顧。其前茅已直逼法京東隅。城中聞普軍將至。急調兵出外。扼要據守。以拒敵人。於時法國議和之使雖行。而普軍之進益速。法京與英京往來郵報。悉已阻遏不通。列國使臣竊料普王之意。必待攻破法京。然後立約議和。並欲重立拿破崙第三爲國王。九月十七日。日耳曼兵揚言欲攻那文地。法國初以重兵扼威沙耳路。與兩河。以譏察舟舶往來。至是撤兵不復守。法國雕哥律將軍統兵八萬。鎮守克蘭納棉頓兩郡。自多亞至法京。所有驛遞電報。已行停止。自棧棣離至阿連。駕空之電氣鐵線。亦爲普軍所斷。普軍由弭士進兵。已過仙河。用馬車載大礮五十尊。道經蘇士克列爹。其間有毛豪士亞尼兩小邑。已爲普人攻據。用以屯兵。時

普郡王方困巴彥於蔑士。扼其吭而制其死命。其地甚險。猝未可下。至是始用巨礮轟攻。巴彥閉城不出。蓋自九月二日鏖戰之後。至今未一交兵也。法京初得蔑士消息。云其地軍士雄強。糈糧充足。法京諸臣皆倚之爲外援。九月十日。普營舉礮百一響。以賀師丹之捷也。欲法京圍城之衆聞之解體。普軍旣築長圍。又於四周深掘坑塹。以阻法軍。越二日。巴彥釋所擒之普國俘囚。驅之出城。普郡王集其麾下議曰。蔑士天設之險。勢難以力攻。今我與彼衆寡相當。彼以憑城自固。偷逸須臾。若我攻之過急。則困獸猶鬪。觸網逸阱。所不及料。不若緩以時日。以承其弊。使彼糧絕援窮。然後圖之。未爲晚也。師久則疲。士飢則困。此時雖欲戰不能矣。不戰不出不

降何待。奚必求下於一鼓多傷我士卒哉。衆曰。善。自是攻城不以巨礮。俟其出。則用勁旅扼遏之而已。蔑士有電線。由地底潛達士打拉卜。巴彥乃用之以通消息於城將余烈。然士打拉士卜亦有圍兵。弗能援也。蔑士守兵屢以空瓶貯書札。以樺木固塞瓶口。投之靡思。河使順流浮出。冀外人拾得。藉以達信音。有以師丹納款。法王蒙塵告巴彥者。巴彥慨然太息曰。事不可爲矣。然大丈夫甯報國而死耳。豈能作降虜哉。吾今爲蔑士之主。斷不可以再誤。於是軍心稍固。自八月至九月。法國軍器局製造鎗礮。日不暇給。多往購於英。普營聞之。特檄其國駐英公使。移書於英國總理衙門云。貴國旣居局外。守兩不偏助之義。何以貴國商人竟有私售鎗礮於

法者。豈貴國未及察歟。敢請其故。英國總理外部事務大臣。覆書於普云。我國一切舉動。俱依萬國公法行事。昔者戰於克禮棉之役。貴國所行若何。敬當奉以周旋。弗敢失墜。九月十八日。法國老臣爹亞。由英京啓行。往塙京維也納。後復由塙京逕達俄羅斯。旋抵俄京。留於館舍者數日。所與款納延接者。俄國大臣而已。俄主未之召見也。是日普國大軍。圍法京東城。其北連營數十里。自法京至阿連。皆普軍也。由干富蘭達於哈華。皆有火輪鐵路。至是盡爲普軍所毀。惟自法京至布列單呢。其路尙通。普人圖下土魯城。命軍士悉力攻圍。十有八日。以馬車運載大礮至者。粉然不絕於道。其礮之巨約二十四。拋得拋得英國語也。普人若得是城。則輪車之路。可直達法京矣。由土魯城

往蕪邑之車路。普人已自建築。蕪邑離法京。僅五十有四里耳。法護國廷臣。傳諭通國。刻期十月二日。公舉人員。群集國會議事。是時美國瑞士比利時三國公使。仍駐法京。法國總理外部事務大臣。致書列國云。敝邦所以公舉人員。集議於國會者。原欲畀廷臣以議和立約之權。俾敝國之事。得以申理也。此役之興。夫豈法民之所欲。此循一千七百九十六年公舉大旨。惟民自主底於和平耳。旋普相卽有覆函。已許。法國總理外部事務大臣。至蕪邑。普王大營。謁見議和。所有普法來往移文。皆英國從中代爲傳遞。由兩國駐英公使達於本國。時法廷建議和之策者。以發孚爲首。因發孚乃總理外部事務大臣也。其餘廷臣。皆隱有所不欲。意見既未僉同。

而籌論亦無端緒。故所議若何。未有成說。護國廷臣諭令水師戰艦。扼守北海。毋許他舶妄自出入。且命堵塞各口要路。凡險隘之區。斷道絕行。所以杜普軍進路。特立魯芝佛フオスト總司厥事。爲之首領。普人聞之。立意取道西南隅。圍攻法京。駐劄大營於華西路。以截法軍之衝突。普王子進兵至寬丹布路。於是法京四周。遍布普軍。內外間隔。消息不通。普國又以圍兵不足於用。特下徵調之令。凡國中壯丁。悉募爲兵。先行團練。然後檄至。旋於波蘭郡。增益勁旅。凡計步兵七隊。往守邊疆。以嚴防衛。普國大將士顛密士タイヌ才畧縱橫。操守雄毅。長於用兵。甚得軍心。向統第一路軍。今普王立爲波沁總督。以資鎮守。又調福堅士田フアル至波羅的海。爲統理水師提督。所以

防海道也。法廷執政。檄諭通國之人。習武練兵。入衛京師。在森布連邑卑蘇邑左右。多曠地。一望平坦。便於建營。普軍一萬五千。屯駐於此。意圖乘勢逕趨仙郡。法人偵知。立調兵二萬五千人逐之。普軍以衆寡不敵。遂退。喪亡者頗多。然法京之圍漸密。十七十八兩日。普法兩軍戰於城外。僅以偏師角勝。十九日。法將雲奈統大隊出城與普師決勝負。分三翼而前。兵鋒甫交。勢甚猛銳。普出奇兵橫截之。法大受創。陳斬千餘。俘獲三千餘人。追奔逐北。尸相枕籍。是日。法軍敗績。遂退入城。於是普軍環圍四周。普王子駐師華西路。自華西路至雲仙ワキシ聶皆普營也。沿途綿亘不斷。無不互相聯絡。二十日。以大利兵入羅馬城。初法人之撤羅馬戍兵也。教王朴カク以驟

失大援。心懷震懼。城中雖有額兵。然不足以資守禦。於是以大利王躍然起曰。是正天與以可圖之機也。時哉不可失。遂以克復故都爲名。遣兵四出。一日之間。游騎遂及其城下。守兵請於教王。願背城以決一戰。教王止之。撤守開關以待。但傳檄國中云。如以大利一卒入城。卽將城中會堂。鍵閉停止禮拜。蓋以恐之也。以大利王竟置罔聞。然卒未行其說云。以兵旣入。教王疏附之兵。欲與以兵相拒。教王傳諭不許。因之罷隊歸營。未嘗以一鎗矢相加也。以大利王親統羽林。入羅馬城中。駐劄。以羅馬爲以大利新京。君士但丁爲舊京。二十一日。法臣發孚承歐洲諸國命。由法京往普營。謁見普相於燕邑。先立暫爲息兵之約。然後集衆至國會。與普議

和。普相於接納之頃。禮貌不甚優隆。但言議和之舉。殊愜衆望。如是。可以保全法京。免至毀傷於兵火。特是法廷政出多門。議和之據。以何爲質。發孚以三事呈於普相。謂法今與普約者。法三章耳。其一願將普法交界處。如士打拉士卜蔑士兩郡。前時所築礮臺。盡行毀除。其二願將國中所有戰船撥半。以歸普國。其三所有普國軍需。自開仗之日始。至議和之日止。所費若干。悉願賠償。今法已爲自主之國。立約議和。出自民意。必可以要諸恆久。普相既覽。未之許也。頃之乃告發孚曰。敝國所求者。不在酬餉。而在得地。普法交界有兩省地。一曰亞魯西士。一曰羅連。向時固屬之於敝國者也。因法之先王恃其兵力之強。蠶食敝國。一戰而勝。遂爲所據。今者

敵國雅不欲用兵。而橫被侵凌。故不得已起而應之。蒙天之眷。得至於此。然敵國所以自爲計者。亦不過返故土。蒙舊業耳。非真有貪地之陰謀。闢疆之奢願也。倘貴國許之。俾共敦輯睦。永戢干戈。豈不幸甚。夫疆場之事。一勝一敗。何常之有。昔以勝而得之。今以敗而失之。有得必有失。情理之常也。於貴國何害焉。如不然者。敵國不能以師退。議和之舉。非所聞命。發孚曰。然則欲立息兵。暫約。又當何如。普相曰。今者我兵圍土魯瓦頓士打拉士卜三城。旦夕將下。請卽獻城納款。毋得抗命。而更以法京城外瓦拉靈礮臺爲質。議和旣成。然後撤兵。發孚曰。如是不如。以法京拱手。而讓之貴國也。當發孚初詣普營也。意欲說普相以情動之。謂普相旣肯。則普王

易與耳。遂與普相反覆辨論。堅不能移。普相所索奢。發孚所許約。因是兩不相入。所議卒未成。發孚慷慨發憤。泣數行下。遂與普相別言。旋法京。法京諸臣聞普相之言。均譁然曰。是欲降我邦爲次國矣。通國人民。必皆以爲不可。誠出於此。則普愈強。法愈弱。將來受其制伏。伊於胡底。甯使喪身灰燼。豈甘救危於目前。而貽禍於日後也。蓋此兩省據乎上游。形勢雄壯。進可以攻。退可以守。法若割與普。是自失其屏蔽矣。所以甯出於背城借一。而不願蹈割地求和之覆轍也。發孚議和始末。有自述日記。爲最詳。此乃發孚於遄返法京之時。寄往列國者。其日記云。九月二十一日申刻。我由法京行抵燕邑。在營見普國前鋒。謂我曰。子來欲謁我王。我相乎。余曰。

然曰然則且駐爾行踪勿再前也。吾王乘輿已由蕪邑詣花厘亞。相君亦隨行矣。蓋將於其地圖宴息也。於是予始知前時已與普王相遇。特以取道偶歧。遂至失之於交臂也。乃回車往詣。沿途所見村舍。幾於十室九空。蓋懼普軍之搜括。故遁而遠徙也。於時林樹少疎。屋廬半圯。斜照銜山。人聲闐寂。不禁爲之淒然。隕涕者久之。少頃過行。會普相於中途。乃停車擇一小室。共入暫憩。其地逼狹。不能作促膝談。乃別至一空屋中。其屋相距不過數十武。稍加灑掃。延予入坐。觀其牕牖間。塵網蛛封。似久無人居者。浮埃積几。濁氛撲鼻。殊不可耐。坐既定。遂與商權國事。反覆辨論。迄無成說。既返旅邸。遂將彼此所談。抽筆記之。亦惟錄其要語。據事直書而已。當

我見普相時。先述其進謁之意。傾慕之懷。繼言法國朝廷意旨已定。業將議和。端委告諸列國。惟我之來。特欲知普相之意爲何如耳。兩國交兵以來。從未遣一介行李。傳彼此之命。參講論之詞。倉猝興師。禍至於此。敗者固已一蹶不振。恐勝者亦未嘗無害也。原夫此釁之開。肇自一人。今法已易爲民主之國。政令一新。不宜復承茲弊。除舊憾。締新盟。彌嫌隙。修和好。是則法之所甚願也。但欲使其納土地。割疆宇。蹙國百里。益敵厚鄰。不能長享太平之福。則法雖奔北之餘。不敢聞命。普相曰。鄙意有可以議和者。無不樂於立約聯盟。永敦輯睦。法廷執政諸臣。力欲歸咎於啓釁之一人。冀欲藉以爲講好地。我非不知之。特此廷臣權勢危若朝露。身命薄於浮

普濟新編卷四
雲其言何足恃哉。試觀數日間。法京不爲我所攻取。則內亂亦將作矣。恐彼廷臣一切懸於其手耳。我卽止之。曰。法京中豈有亂民哉。是則我所未聞也。城中百萬蒼生。三尺赤子。無不精忠貫日。高義薄雲。豈有袒敵行私。揭竿謀叛。致壞護國之大局。重披猖於危急存亡之秋哉。相君將以爲廷臣權不足耶。勢不集耶。則我以舉國之向背爲權。億兆之是非爲勢。交之於國會。憑之以公論。和議之成。由此而定。普相曰。國會旣開。所以擴展其心志。增益其智識者。或非吾之所能逆料。第國會從衆心起見。則必以戰爲主。曩者華鐵路之戰。沙都瓦之役。無預於法國事。猶且旦暮不忘。况經大創於師丹。而肯愬置之乎。法有意憑凌日耳曼者。屢矣。圖併其疆土。憎

嫉其盛強。自路易第十四至拿破崙第三。咸懷此志。不少轉移。故下議院甫聞啓釁。衆皆稱賀。上之所好。下必有甚焉者矣。於此可見。我則辨之曰。否。不然。日前下議院接展主和消息。同聲稱頌者盈座。我民之不欲戰。而願和。亦可知矣。於是各執一見。持論良久。我因問普相曰。和議章程。若何裁度。竊願聞之。普相曰。夫所謂立約講好者。原欲持久遠。永輯和。俾強鄰無至於侵凌。國勢得臻於鞏固。鄙見所及最重者。在於割地而已。士打拉士卜猶屋廬之有屏藩也。蔑士猶門牆之有障塞也。瓦頓猶江河之有隄岸也。三者皆所以自保而制人者也。我必取之。以捍蔽我國家。鎮定我民庶。衛固我疆圉。特恐事關重大。非彼此不能遽議。容徐圖之。當無不成。我

復詢之曰。然則約款條目。可得聞乎。普相曰。瀕禮吳河者。有兩省。瀕摩思厘河者。有數郡。如蔑士沙連辰腮。皆在其內。均我所欲取也。我謂之曰。如是不獨法民所不許。歐洲諸國。亦斷不能從者也。普相曰。我亦知其弗願。但彼拒之愈堅。則我必取之愈決。我知不日間。普軍雲集。必當再舉。勝負之數。既分。然後事可知也。我力辨其說之非。曰。君不獨藐視歐洲列國。亦輕我朝廷。太甚矣。敵國雖小。豈肯遽以屢敗之餘。而短氣降志哉。甯舉國沉淪。斷不自辱。蓋割地之議。必待民心願。從始可行也。我惟知我民之不欲。故姑於集衆會論之時。然後再爲籌度。不然者。普直與法舉國之民。相抗耳。今普乘勝而驕。必欲割裂我版圖。毀除我基業。則亦惟命。普相曰。子

言過矣。余意豈其然哉。我卽振襟言曰。苟貴國善於持盈保勝。許我選擇人員。以赴國會。推舉賢者爲君。有國會。然後有朝廷。有朝廷。然後權勢歸集於一。議和諸事。乃得主持。普相曰。汝特欲緩兵耳。故借端前來遊說。俾汝國得預爲之備。我豈肯墮汝術中哉。國會之選。斷不能從。時已日落。暮色蒼然。特我腦中所欲言者。尙未得傾吐於普相之前。因請於普相。俛於夕間。往花厘亞營。詣其寢息之所。再與相見。於是揖別普相而返。暫息旅館。聊解征驂。中心殷憂。不遑假寐。我冀與普相明白剖析。始終其事。遂於亥刻。復謁普相。我卽告之曰。頃所論列。擬呈朝廷。令其宣諭官民。俾知君旨。普相曰。汝可徐爲刊錄。於是委曲罄談。至於半夜。我所言者。論及國會

居多。普相似爲我說所折服。其意稍動。乃進籌暫爲息兵之約。并一切款例。我請以十有四日爲期。普相答詞未甚明了。但言當俟普王裁奪。因擬翼日午正再行入見。自是留連三日。迄無定論。悵惘之懷。良不可任。越日我再往花厘亞。午秒。普相由普王大營馳驛而至。出示所擬暫爲息兵之約。乃以日耳曼字體所書。普相口講手畫。轉述甚詳。約中必欲先交士打拉士卜土魯科士北三城爲質。我謂國會之開。必集議於法京。普相曰。然則請與花刺連岡上一帶礮臺。我曰。如是無異於以法京輸敵也。法國人員安肯從汝鎗林彈雨之中。前來會議乎。我本欲將此番相會之言。詳達朝廷。但今貴國所請之款。殊出意外。不佞安敢妄瀆哉。普相曰。如是則當

別行設法。我曰。若在多亞城會議。則法京外之礮臺。可無庸質。尙望相君主張代爲上達。普相曰。士打拉士卜自被圍以來。危逼萬分。旦夕間必破矣。礮臺毀拒守難。城堞壞保禦疎。固何難下之而朝食哉。汝將意謂吾國力不能遽下耶。譬諸因尖尼已在吾掌握中矣。我請於汝朝廷獻城納款。俘守兵。繳軍械。暫以爲質。則士卒不至於多傷。民命可期於永保。所以爲汝國計者。未嘗不是也。我聞普相言。志激情傷。不禁起而言曰。君忘與法國之人共語矣。夫士打拉士卜固未易下也。其城險隘。其將忠勇。士忘其死。民忘其身。固守不變。與城存亡。此其風義爲何如哉。天下之人。方且聞而仰慕之。乃貴國遽有此請。是將率法國之人。而盡爲降虜也。普相曰。請

少安以畢吾說。吾非過傷汝情。但依戰例言之耳。倘蒙見許於吾王。卽刪此款。亦無不可。普相於是轉達普王。未及片刻而回。因謂普王已許在多亞城會議。惟士打拉士卜當依出獻例。我於時氣憤填膺。淚若縷縷。悲憂惻怛。幾於眩蹶。久之拭涕以謝普相。謂適者失禮之愆。尙請憐救。因與之別。且曰我深悔多此一來矣。然我亦無所惜也。吾經歷風霜。跋涉道路。艱楚畢嘗。亦我分內事耳。我必將所論顛末。上達朝廷。倘朝廷再命。我來雖甚難。亦所不辭。相君仁愛爲懷。欸待優渥。中心念之。感謝弗遑。斯時敵國乞和。而貴邦主戰。必出於戰。亦聽之而已。法京之民。懷忠憤。具義勇。一志於守。百折不撓。以期盡瘁於國家。嗚呼忠義所激。何難挽逆境爲坦途。奮

疲兵成勁旅。安見普之必勝。法之必敗乎。舉國同心。誓死狗敵。普雖能勝之。而不能伏之也。苟有可籍以禦侮靖患者。必圖再舉。敗國之臣。請從此逝。既別普相。驅車逕旋。遙望法京。步步淒惻。胸懷憤懣。疇可與言。向者所望至此。成空。然尙冀其有萬一之濟也。以上皆發孚日記所述。觀其持議居心。亦可與參亞相伯仲矣。原普相之必欲割亞魯西士羅連兩省者。因其民人與日耳曼人言語相同。心志相合。若一隸普國疆宇。則從普國之政。易如流水。所以普國君臣蓄意圖之者。已非一日。至此始得遂其欲也。當普法之將議和息戰也。普京伯靈衆商請於首相俾思麥曰。法國賠餉一欸。須得通盤籌算其數。方明不獨軍需宜酬。卽商項亦當補償。蓋自用

兵以來。法國於各處海口。捕擄普人貨船甚多。其聞風折還。或在口灣泊者。又不知凡幾。貿易之停。率由於此。歲入羨賞。大爲減色。雖不欲取償於法國。其能得乎。日耳曼之不里門。邦船主。士的汀。船主。聯名入稟。普相曰。今聞和議將興。酬欸具有成說。此軍國之事。非商人所敢預聞。然海中貨船往來。時被擄劫。因之各商裏足不前。折閱之賞。爲數甚巨。酬欸中必當議及於此。令其承賠。不獨擄去之船。卽各屬地。各外國停泊之船。亦宜償。凡出入口商船。經法國所捕拿者。所償之數。由船主核斷。其所陳如此。蓋顯與法國爲難。而不利於和議之遽成也。至是卒未允。九月二十二日。普相致書於日耳曼。駐筭各國公使曰。我與法國固夙所交好也。今之猝爾

構兵。凡在友邦。必有所未悉。夫固彼爲禍始。而我應之。彼爲戎首。而我繼之。豈敢開端發難也哉。茲者將我王意旨。與日耳曼諸邦所見。爲詳縷以言之。法國之禮制規模。典章文物。我國本甚敬之愛之。向慕則效之。輯和協比。無有間言。不意日復一日。和好浸成嫌隙。自上下國會。而至街談巷議。爵紳顯宦。而逮士庶工商。朝論廷評。而迄郵傳日報。無不一志於戰。欲取我國之土疆。以擴彼朝之區宇。彼與我國。啓爭肇釁。幾將大聲而疾呼。不憚踴躍以從事。凡我友邦。聞其謀者。亦莫敢出一言。焉法攻普之心。幾於舉國如此。故法王云。此戰也。非由己志。有逼之使然者也。由是觀之。安能以法國之人心。爲議和之左券也哉。我國斷勿爲其所蔽。而因以自蒙。

法自爲我所挫敗。其銜憾蓄忿。當無已時。夫豈能一日忘哉。無論立何盟約。彼必不能踐言而釋怨耳。幸而我勝彼敗。可以制其侵突。遏其驕凌。假而我戰不利。則彼之欲逞矣。設使我國於此。撤守兵。還侵地。旋師出境。概無所索。不必強其割地。不必令其酬餉。一切利益。我皆不取。惟欲得克捷之聲名而已。如是可冀其忘情於我乎。必不能也。彼報復之懷。侵奪之念。圖之於平日。必發之於一朝。方謂普之厚。則法之薄。非普是侵。將焉取之。嗚呼。今日普之所以幸免。法之攻擊者。惟恃乎理勝氣壯而已。一千八百六十七年之役。我國本不欲戰。有激我以興師用衆者。是以雖勝。而彼亦無所怨也。因是始作難者。反望兩國之言歸於好。夫我國之所以待法

者亦云至矣。忍宿忿。捐微嫌。時韜刃於鞘。而不欲輕於一試。今者如劍出室。如矢離弦矣。忍難再忍。發不可收。久鬱者。思奮。久屈者。思伸。勝負之數。將決於今日矣。於此而猶不圖利取益。以免後來之禍患。將在何時乎。一千八百十五年。諸國同力合兵。以制法之橫逆。原爲歐洲昇平計也。斯時之合縱連衡。彼援我助者。非止一邦。今則惟日耳曼一國耳。然我國非欲與法爲難也。爲維持我邦本。保衛我國體。立歐洲康固之基。奠日耳曼安平之局。所以出於一戰耳。夫豈得已哉。今日和議之興。必得有所藉手。而後我國可立於不敗之地。我不取之於其朝廷。必問之於其國人。無論彼國何人爲王。何人爲帝。我必償我之所求。而後已。百年來彼之恃險憑凌。

我者不勝。僂指故今日立約首條。必先致意於此。當固我之邊隅。樹我之藩衛。俾日耳曼南邦有所屏蔽。則他日法之圖侵。當不至如是之易。我國議欲割西境。據礮臺。以外禦侮。而內自強者。卽此意也。特陳鄙見。悉在是書。有問者不妨以是答之。是日普軍圍攻土魯城益急。九月二十三日下之。先是普營巨礮備集。遂開礮轟攻。自朝達暮。連環迭擊。炸彈飛墜城中。火星四迸。東南兩方。火燄突起。廬舍盡焚。其光燭天。男婦號哭之聲鼎沸。法國守城將軍。謀於衆士曰。危城不可坐守。民命在所當惜。不如納降。再爲良圖。乃遣人手執降幡。詣普將軍門。獻欸。酉刻。麥連畢公爵。士威連公爵。見城將降。書至營。卽遞傳電報。往南士大營。咨於普國鎮守羅連郡總

督保年。請命裁奪。迨夕。保督移文至。謂允其投誠。於是法軍出降者三千人。翼日清晨。普軍整隊入城。選派兵士二旗。扼守其城礮臺。普軍既得此城。所有餉糈軍實。皆以輪車運往法京。轉輸便速。無所阻碍矣。普人於亞魯西士羅連兩郡。設立驛館。以通郵遞。法人以前與普相所議和欸。刊諸郵報。傳示列國。斥其持論不公。普相特自辨云。法人所云。敝國必欲索其華刺厘仁礮臺。方允息兵者。此欸非眞也。英官班朗士在嘉拉斯。告諭衆民曰。法與英密邇隣封。夙敦和好。今有事之秋。英國分應相助。與之調停息戰。但議和之舉。必當一秉至公。勿留爲異日啓釁之端倪。搆兵之萌蘖。此次普法之戰。我英國大可旁觀取利。夫普國之所以勝者。在寓兵於民。

相資並用。若我國不能專賴於壯丁。則所以爲保國常規者。自當別圖良策也。法京外有高阜數處。可以屯營據守。普軍奪取之。其地距法京僅十有二里。法軍出擊普營。小有勝捷。戰於華西路。陳擒普軍二千人。又戰於法京外。法人驟出精騎。衝突普之蘇士兵右翼。未及預防。忽驚而潰。左翼與中路。整肅行伍。依次而退。法廷執政大臣。宣諭京師內外民人。起義勤王。力戰拒敵。以拯國家之顛危。九月二十四日。法京圍城兵民相爭。久之始定。普軍屯於花厘亞者。偶登高處。望見法京城內。有施放鎗礮於達衢中者。莫辨其爲誰何。於是傳言法京內亂者。譁然載道。法國總理內部大臣。致書核士太守。謂法京人心協固。衆志成城。前聞轟擊於法京衢市。此

訛傳耳。不足爲據。法民忠勇。爲國授命不辭。竭乃心力。嬰城固守。揆其大勢。今歲冬間。必可無害。普人環圍法京。益密。所有傳遞信札。自別國至法京者。皆不得入。歐洲列國使臣。致書普相俾思麥。請於七日中一次遣人攜書出入。九月二十六日。普法兩軍於亞田尼鄉。小爲接仗。其地在阿連郡之外。兩軍始合戰。未甚力。第普兵衆於法。法鎮守其地之將。恐衆寡不敵。遽吹角集兵。退往多哇城中。於是普軍驟進圍城。環之三匝。二十七日。遂下此城。普軍攻法之美思亞城及沙芝威兒。甚急。城將負固不服。普人下令。於九月二十八日。舉大礮攻城。玉石無分。於是城中居民。於先一日。紛紛遁走。顛難鄉。蓋以避礮擊也。流離之狀。目不忍觀。時法將巴彥以十

七萬衆。坐困於蔑士。三戰三蹶。險阻盡失。長圍深閉。飛越爲難。普郡王志不在急攻。曰。彼巴彥者。無異乎釜中之魚。阱中之獸耳。稍緩須臾。無不斃者。九月二十七日。法兵圖突圍走。整隊出攻普軍。兵刃始接。勢銳氣盛。法軍無不轉戰而前。普軍知不可以力敵。佯退以誘之。於是斂兵退出。亞力堅尼士境。法兵驟進。再攻普軍第二路之首隊。不料普之援兵。自後突出。遏截法軍歸路。前後夾擊。法遂不支。法軍觀勢危急。恐不能回蔑士。其陳遂亂。紛然潰圍。散走退入城中。爲普軍所擒者數百人。法於蔑士四周。所設礮臺林立。曰。機連曰。聖堅田曰。聖招連。是日。同時發礮。轟攻普軍。使其不得前進。普軍遂將蔑士外哥倫俾村刺克連治村焚燬。一時烈燄騰空。

光巨霄漢。俾德村朝陽村。火亦延及。俱成灰燼。是日。有一普國騎兵。乘一劣駟。頗難駕馭。誤入亞村外林中。爲法軍所執。盡褫其衣裸。而縛之樹。至夕。竟凍餓而死。九月二十七日。蔑士法軍。大整隊伍。出與普軍。共決勝負。以騎兵爲前茅。礮兵爲中權。步兵爲後勁。出至亞堅里呢。轉鬪而前。普軍反礮回攻。連環迭放。遂擊退法兵。普人卽將刺克連治村哥倫俾村焚餘之屋。再付一炬。數十里間。悉成焦土。附近數村。亦爲普法兩軍大礮轟攻。所毀廬舍零落。半爲瓦礫場矣。

汎。毀。盡。舍。零。落。半。為。瓦。礫。樹。突。
 十里間悉如。熟土。削。取。煤。材。亦。為。普。共。兩。軍。大。繼。轟。定。
 人。輪。機。陳。京。車。餘。林。高。命。樹。林。焚。翁。之。屋。再。於。一。歌。煨。
 到。轉。圖。而。前。普。軍。又。繼。回。進。戰。戰。甚。效。遂。擊。鼓。普。共。普。
 以。砲。兵。為。前。裝。砲。兵。為。中。擊。砲。兵。為。後。擊。砲。兵。出。至。亞。聖。里。
 且。二。十。日。鼓。士。裝。軍。大。營。網。出。現。普。軍。共。為。砲。兵。
 普。軍。砲。炸。盡。斃。其。交。所。而。前。之。樹。至。又。竟。亦。燬。而。兵。共。
 一。普。國。砲。兵。乘。一。夜。繼。砲。兵。擊。砲。兵。類。人。亞。林。伐。林。中。為。

普法戰紀卷四

終

校合山田榮造

